

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 393037 21 St
Tuzla, 23.06.2022.godine

Općinski sud u Tuzli, sudija Antonela Đaković, kao stečajni sudija, u stečajnom postupku nad imovinom dužnika „LAMINA INŽENJERING“ d.o.o. za proizvodnju, promet i usluge Lukavac u stečaju, ul. Magistralni put bb, dana 23.06.2022. godine donio je:

R J E Š E N J E

ZAKLJUČUJE SE stečajni postupak nad imovinom dužnika „LAMINA INŽENJERING“ d.o.o. za proizvodnju, promet i usluge Lukavac u stečaju, ul. Magistralni put bb, zbog nedovoljnosti stečajne mase.

Rješenje o zaključenju stečajnog postupka objavit će se u „Službenim novinama FBiH“ i na oglasnoj ploči ovog suda.

Po pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Tuzli, radi brisanja stečajnog dužnika iz sudskog registra.

Obavještavaju se stečajni dužnik i stečajni upravnik da pravne posljedice zaključenja stečajnog postupka nastupaju 8 dana nakon objavljivanja ovog rješenja u „Službenim novinama FBiH“.

O b r a z l o ž e n j e

Dana 10.11.2021.godine otvoren je stečajni postupak nad imovinom dužnika „LAMINA INŽENJERING“ d.o.o. za proizvodnju, promet i usluge Lukavac, a za stečajnog upravnika imenovan je Fahrudin Arapčić iz Lukavca.

U toku stečajnog postupka pristiglo je ukupno 10 prijava potraživanja. Prije održavanja ispitnog i izvještajnog ročišta stečajni upravnik dostavio je u spis suda popis prijavljenih potraživanja, koji je objavljen na oglasnoj ploči i pisarnici suda, kao i Izvještaj o ekonomsko-finansijskom stanju stečajnog dužnika. Održana su ukupno dva ispitna ročišta, te su priznata potraživanja povjerilaca u ukupnom iznosu od 520.568,96 KM, od čega se iznos od 45.084,91 KM odnosi na viši isplatni red, a iznos od 475.484,05 KM na opći isplatni red. Stečajni upravnik je utvrdio da stečajni dužnik nema nepokretne imovine, a pokretna imovina koja je prodana u sekundarne sirovine za iznos od 18.240,00 KM, dovoljna je samo za pokriće troškova stečajnog postupka.

Dana 16.05.2022.godine stečajni upravnik je u spis suda dostavio prijavu nedovoljnosti stečajne mase. U prijavi se navodi da je u toku stečajnog postupka utvrđeno da stečajni dužnik nema novčanih sredstava, niti nepokretne imovine, a unovčena pokretna imovina je dovoljna samo za pokriće troškova stečajnog postupka, te je stečajni upravnik na posebnom ispitnom i izvještajnom ročištu održanom dana 08.06.2022.godine predložio da se stečajni postupak zaključi zbog nedovoljnosti stečajne mase.

Sud je rješenjem od 08.06.2022.godine, a koje je objavljeno u "Službenim novinama FBiH" broj: 49/22 od 22.06.2022.godine, javno objavio prijavu nedovoljnosti stečajne mase, a na osnovu odredbe člana 197. stav 3. Zakona o stečaju FBiH (Službene novine broj: 53/2021).

Odredbom člana 200. stav 1. Zakona o stečaju propisano je da stečajni sudija zaključuje stečajni postupak čim je stečajni upravnik izvršio diobu stečajne mase, u skladu sa članom 198. ovog zakona, a stavom 2. istog člana je propisano da je stečajni upravnik dužan za svoj rad, nakon prijavljivanja nedovoljnosti stečajne mase, posebno da položi račun stečajnom sudiji. Pored navedenog odredbom člana 200 stav 3. istog Zakona propisano je da ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija će na prijedlog stečajnog upravnika, povjerioca stečajne mase ili po službenoj dužnosti odrediti naknadnu diobu. U ovom slučaju se na odgovarajući način primjenjuju odredbe člana 192. stav 3, i člana 193 i 194 ovog Zakona. Stečajni upravnik je u spis suda dostavio dana 03.05.2022.godine rekapitulaciju troškova nastalih u stečajnom, postupku.

Obzirom da stečajni dužnik nema imovine čijim bi se unovčavanjem namirila potraživanja povjerilaca, to je sud shodno odredbi člana 200. Zakona o stečaju zaključio stečajni postupak i odlučio kao u izreci rješenja.

Prema odredbi člana 204. stav 1. Zakona o stečaju (Službene novine FBiH broj: 53/2021) rješenje o zaključenju stečajnog postupka objavljuje se u „Službenim novinama FBiH“ i oglasnoj ploči suda.

Pravne posljedice zaključenja stečajnog postupka nastupaju 8 dana nakon objavljivanja ovog rješenja u „Službenim novinama FBiH“, a sve shodno članu 204. stav 3. Zakona o stečaju FBiH.

Odluka o brisanju pravnog lica iz javnih registara zasnovana je na odredbi člana 204. stav 5. Zakona o stečaju FBiH.

**Stečajni sudija,
Antonela Đaković**

POUKA: Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 (osam) dana, od dana objave rješenja u „Službenim novinama FBiH“.